

## **GARIS PANDUAN PENGANUGERAHAN PROFESOR EMERITUS UNIVERSITI PENDIDIKAN SULTAN IDRIS**

### **1. TUJUAN**

Garis Panduan ini disediakan selaras dengan peruntukan yang terdapat dalam Perlembagaan Universiti Pendidikan Sultan Idris (UPS I). Ia bertujuan untuk memberi panduan kepada Fakulti / Pusat / Institut, Jawatankuasa Ijazah Kehormat, Senat dan Lembaga Pengarah Universiti dalam membuat keputusan bagi hal-hal berkaitan penganugerahan Gelaran Profesor Emeritus.

### **2. LATAR BELAKANG**

#### **2.1 Gelaran Profesor Emeritus**

2.1.1 Profesor Emeritus adalah satu anugerah seumur hidup untuk Profesor yang telah bersara sepenuhnya dari perkhidmatan tetapi terus menyumbang dalam bidang keilmuan. (Garis Panduan Penggunaan Gelaran Profesor, Majlis Profesor Negara, 2014).

2.1.2 Gelaran ini boleh digunakan oleh pemegang sepanjang hayat dan tidak menerima sebarang ganjaran tambahan.

### **3. KRITERIA CALON GELARAN PROFESOR EMERITUS**

3.1 Mesyuarat Jawatankuasa Ijazah Kehormat Kali Ke-25 Bilangan 1/2014 pada 3 April 2014 dan Mesyuarat Senat Kali Ke-134 Bilangan 9/2015 pada 22 September 2015 telah meluluskan kriteria penganugerahan Gelaran Profesor Emeritus seperti berikut:

- i. Berkhidmat dengan UPS I sebagai Profesor sepenuh masa bagi tempoh tidak kurang tujuh (7) tahun;
- ii. Calon hendaklah yang telah bersara wajib dan tidak lagi berkhidmat secara kontrak dengan UPS I;
- iii. Bagi Profesor yang dipinjamkan ke organisasi luar, tempoh pinjaman adalah diambil kira sebagai tempoh tujuh (7) tahun tersebut;
- iv. Mempamerkan kecemerlangan dalam bidang pengajaran, penyelidikan, penerbitan, perundingan dan pentadbiran;
- v. Merupakan Ahli Akademik yang tersohor dan termasyhur dalam bidang yang diceburi;
- vi. Menyumbang perkhidmatan yang gemilang dari segi sumbangan idea dan tenaga dalam memajukan bidang kepakarannya sepanjang perkhidmatannya di Universiti;

- vii. Memberikan sumbangan idea dan tenaga terhadap pembangunan dan perkembangan Universiti;
- viii. Mempunyai sifat-sifat kepimpinan dan keperibadian yang tinggi;
- ix. Tidak pernah dikenakan tatatertib oleh Universiti atau tindakan mana-mana mahkamah.

#### 4. PROSEDUR PENCALONAN

- 4.1 Pencalonan seseorang tokoh penerima Profesor Emeritus boleh dibuat oleh Fakulti / Pusat / Institut melalui mesyuarat di jabatan masing-masing.
- 4.2 Kesemua pencalonan perlu dikemukakan untuk pertimbangan Mesyuarat Jawatankuasa Ijazah Kehormat sebelum diperakukan oleh Senat dan Lembaga Pengarah Universiti untuk kelulusan.
- 4.3 Carta alir proses pencalonan Profesor Emeritus adalah seperti di **Lampiran A**.

#### 5. TANGGUNGJAWAB FAKULTI/ PUSAT / INSTITUT

- 5.1 Fakulti / Pusat / Institut selepas bersetuju mencalonkan mana-mana tokoh sebagai penerima Profesor Emeritus hendaklah melengkapkan Borang Cadangan Penerima Profesor Emeritus di **Lampiran B**.
- 5.2 Borang Pencalonan tersebut hendaklah dilampirkan bersama dengan Biodata Tokoh Calon yang perlu disediakan dalam antara 5 hingga 20 muka surat berlangkau 1.5" dan font ARIAL 11 yang boleh disediakan di dalam Bahasa Melayu atau Bahasa Inggeris.
- 5.3 Kedua-dua borang dan biodata tokoh hendaklah diserahkan kepada BHEA mengikut garis masa yang akan ditetapkan bergantung kepada tarikh Istiadat Konvokesyen pada tahun tersebut.
- 5.4 Fakulti / Pusat / Institut perlu melantik seorang pegawai sebagai 'liaison officer' antara penerima dan pihak Universiti dalam urusan temu janji mendapatkan gambar, video (jika perlu), ukuran badan bagi penyediaan jubah penerima, slide, teks 'citation' dekan dan lain-lain urusan sehinggalah Istiadat Konvokesyen bagi penganugerahan tokoh tersebut selesai.
- 5.5 Menyediakan ucap jasa (citation) dalam bentuk (Powerpoint); sama ada dalam Bahasa Malaysia atau Bahasa Inggeris dan jumlah slaid tidak melebihi lima (5) slaid dan memfokuskan kepada pencapaian dan sumbangan penerima gelaran.

#### 6. JAWATANKUASA IJAZAH KEHORMAT

- 6.1 Ahli Jawatankuasa Ijazah Kehormat terdiri daripada:

Pengerusi : Naib Canselor

Ahli	:	Semua Timbalan Naib Canselor Dekan-Dekan Fakulti (wajib dan tidak boleh diwakilkan) Pengarah setiap institut atau pusat
Setiausaha	:	Pendaftar/wakil

**\* Jawatankuasa ini akan dipengerusikan oleh Timbalan Naib Canselor (Akademik dan Antarabangsa) atau wakilnya sekiranya tidak dapat dipengerusikan oleh Naib Canselor.**

6.2 Fungsi Jawatankuasa ini adalah bertanggungjawab kepada Senat berdasarkan perkara-perkara seperti berikut:

- i. Menentukan dasar, peraturan dan kriteria pemilihan calon-calon Profesor Emeritus
- ii. Mengenalpasti calon-calon yang akan dianugerahkan Gelaran Profesor Emeritus.

## 7. TUGAS DAN FUNGSI

7.1 Penganugerahan Profesor Emeritus tidak memberikan ganjaran kewangan atau hak menjadi ahli sesuatu pihak berkuasa atau badan lain di Universiti atau memberikannya kuasa bagi menjalankan apa-apa fungsi eksekutif atau pentadbiran.

7.2 Layak memakai jubah konvokesyen dan berbaris dalam perarakan Konvokesyen sebagai staf akademik Universiti ketika majlis konvokesyen serta disenaraikan dalam buku cenderamata konvokesyen.

7.3 Dijemput menghadiri upacara Universiti yang berkaitan bidang kepakaran beliau.

7.4 Dijemput menghadiri mesyuarat Fakulti sebagai ahli turut hadir tetapi tidak mempunyai kuasa mengundi mengikut budi bicara Dekan Fakulti. Profesor Emeritus boleh dijemput menghadiri mesyuarat fakulti sebagai ahli turut hadir.

7.5 Profesor Emeritus yang berhasrat untuk terlibat aktif dalam aktiviti penyelidikan atau aktiviti akademik Universiti adalah layak untuk disediakan kemudahan pengangkutan dan bantuan staf sokongan. Permohonan bagi mendapatkan kemudahan tersebut di atas perlu dibuat kepada Timbalan Naib Canselor (Penyelidikan dan Inovasi) dengan sokongan Dekan Fakulti berkenaan.

7.6 Profesor Emeritus yang ingin menyambung untuk menyelia pelajar siswazah, atau memainkan peranan utama dalam pengendalian persidangan profesional, atau aktiviti keserjanaan lain akan disediakan kemudahan dan bantuan dalam menjayakan peranan mereka.

## 8. PENGGUNAAN PERUNTUKAN LUAR

8.1 Sekiranya seorang Profesor Emeritus mendapat geran penyelidikan atau lain-lain aktiviti keserjanaan dengan penajaan luar, dekan perlu memperakukan kepada Naib Canselor supaya membenarkan beliau menggunakan peruntukan tersebut.

8.2 Maklumat berikut akan digunakan dalam membantu Naib Canselor dalam membuat keputusan:

- i. Nilai peruntukan yang akan digunakan.
- ii. Maklumat penyelidikan atau lain-lain aktiviti kesarjanaan yang menggunakan peruntukan tersebut.
- iii. Pengesahan daripada Bendahari bahawa pengurusan kewangan adalah teratur.

## 9. GELARAN DAN KEMUDAHAN YANG DIBERIKAN

### 9.1 Gelaran Profesor Emeritus

9.1.1 Gelaran Profesor Emeritus boleh digunakan oleh penerima seperti yang dinyatakan dalam Garis Panduan Penggunaan Gelaran Profesor yang dikeluarkan oleh Majlis Profesor Negara, Jabatan Perdana Menteri pada 2014.

9.1.2 Cara penulisan gelaran Profesor Emeritus hendaklah diletak di hadapan nama penerima seperti contoh berikut:

YBhg. Profesor Emeritus Ali bin Abu  
Profesor Emeritus UPSI

9.2 Walau apa pun yang ditetapkan pada klausa 8.1.1 dan 8.1.2, ianya adalah tertakluk kepada arahan semasa yang dikeluarkan oleh kerajaan mahupun Universiti.

9.3 Penerima Gelaran Profesor Emeritus akan diberikan jubah penganugerahan yang perlu dipakai semasa Istiadat Konvokesyen tersebut berlangsung. Jubah tersebut akan menjadi hak milik penerima dan hanya boleh digunakan untuk majlis UPSI sahaja.

9.4 Diberikan keahlian kehormat perpustakaan.

9.5 Fakulti perlu menyediakan kemudahan bilik kerja, emel, dan talian telefon kepada Profesor Emeritus.

## 10. TIDAK TERMASUK DALAM KELAYAKAN

10.1 Profesor Emeritus tidak layak perkara berikut kecuali dengan kelulusan Naib Canselor:

- i. Mengetuai kumpulan penyelidikan atau perundingan daripada geran universiti.
- ii. Mengurus peruntukan penyelidikan.
- iii. Terlibat dalam Jawatankuasa Pemilihan.
- iv. Lain-lain jawatankuasa di peringkat universiti seperti Panel Penilaian Prestasi, Panel Kenaikan Pangkat.
- v. Memegang jawatan pentadbiran.
- vi. Menjadi penyelia utama bagi penyeliaan pelajar siswazah.

## 11. PENARIKAN BALIK GELARAN

Lembaga Pengarah Universiti atas budi bicaranya boleh menarik balik gelaran Profesor Emeritus apabila pemegang gelaran tersebut telah disabitkan kesalahan jenayah atau salah laku dan melibatkan diri dalam aktiviti yang menjejaskan nama baik Universiti Pendidikan Sultan Idris.

## 12. TERMA RUJUKAN

- 12.1 'Liaison Officer' pada Klausula 4.4 adalah merujuk kepada Timbalan Pendaftar atau Penolong Pendaftar atau lain-lain pegawai yang difikirkan sesuai di fakulti/pusat/institut yang mencalonkan penerima.
- 12.2 Biodata Calon Tokoh Penerima pada Klausula 4.2 bermaksud satu dokumen ringkas yang mengandungi gambar dan data diri calon tokoh.

## 13. PENUTUP

- 13.1 Pemilihan seseorang calon penerima Profesor Emeritus adalah keputusan muktamad Senat.
- 13.2 Mana-mana perkara yang tidak dirangkumi dalam garis panduan ini tetapi digunakan dalam pelaksanaan proses kerja penganugerahan serta tiada mendatangkan mudarat kepada Universiti Pendidikan Sultan Idris atau mana-mana peraturan semasa yang berkuatkuasa adalah dibenarkan.
- 13.3 Garis Panduan ini juga boleh dipinda dari semasa ke semasa berdasarkan peraturan yang dikeluarkan oleh Kerajaan mahupun Universiti atau tuntutan lain bertujuan sebagai penambahbaikan kepada proses sedia ada.
- 13.4 Sebarang pertanyaan lanjut berkaitan Garis Panduan ini bolehlah disalurkan kepada:

Unit Pengijazahan  
Bahagian Hal Ehwal Akademik  
Universiti Pendidikan Sultan Idris  
35900 Tanjong Malim  
Perak Darul Ridzuan  
Telefon : 05-4506994/6313  
Emel : pengijazahan.bhea@upsi.edu.my